

# Timoteo rai

## Faborohacha letoai coroataja

---

Coaiteen enacoauneein Timoteo rai  
quiricha laenaa Faborone

**1** <sup>1</sup>Jeriha Cana Coaunerana jaunte caletoe, Jesocurisito que cachauru relaanune, esenetaauruhane ichaonaa esine raauruhane coina. <sup>2</sup>Ii raine enacoauneein laenaunra quicha belaa cacalabi Timoteo. Raotojoein neeine coina, rai raotonoque ii rausiajeein ii coroatajaneeuurine Cana Inaca Cana Coaunera, Cana Curuaanaa Jesocurisito, naonjoain.

**“Nariha,” naain ichoreniha  
Cana Coaunera corojeeun**

<sup>3</sup>Jerichanejeein aichejetocuruha caferateracurune rijijieina Cana Coaunera belaa, nere tonoraain casuujua coaraain neeun. Itolere banana janotiin netojoein Cana Coaunera bajaebajaecaanne jana casuujuanaha neeoritohine, “Nariha,” naain ichoreniha Cana Coaunera corojeeun.

<sup>4</sup>Itolere banana inonta baca raainaine coaajeeun. Nii jaunna ichoaranaa jereun, jataen raotojoein raachoojoein nihanune coina. <sup>5</sup>Ishuujua coarain Cana Coaunera esenetaaine quena, casuujua ereerejeun coaaucaanne. Jerichanejeein techu Cana Coaunera esenetaurelu edaa

Loira, choba Eonise, naonjoaaihunri. Nii jaunna, “Daae, rai neba, naonjoaaihunri rijijieinte esinae rauhijiriin Cana Coaunera tonorae Timoteo,” naain casuujua ereerejeun.

**Atiin coejelanaala, “Canacaanu  
Curuaanaa Jesocurisito ere  
tonoraera nichaun” naain  
joaenrein cache rai beeu.**

<sup>6</sup>Nii jaunna ichei aitoon, atiin enacoauneein que nemucuhin, nii Cana Coaunera tenojoin amihanenaa ichaaine coina. Nii ichouturi choae cacoi meecaanune jana Cana Coauneraacha tei amihanenaa ichaau. <sup>7</sup>Coa casiha. Coatiha casiinaa najaannu que rai esenetaera suujua corihe Cana Coaunera. Laraajiin, neunaain, Cana Coaunera, leeochoauru, naonjoain belaa nererojoecaelanaala neein, suujua coaraain nihane coinete esenetaera suujua core Cana Coaunera.

<sup>8</sup>Atiin coejelanaala, “Canacaanu Curuaanaa Jesocurisito ere tonoraera nichaun,” naain joaenrein cache rai beeu. Coa caresero cuhane caseteco neein nihanune que necoejiha, Jesocurisito que cache relaanune coreniha caseteco neein nihanune jaun. Aihana jaun, iitonai Jesocurisito que cache relaaie coreniha, iitonai

rerohecaauruhane, atiin laraajiin neeunaain neeu. Ii coroatajanerichaain Cana Coaunerana jaunte, abaantaain neunanaa naineriquiin.

<sup>9</sup>Caohachaaain nihacachene que ainaa tocohaneente, cana cotijiaain cana rae Cana Coaunera, acaihanejein nere tonoraera neein nihacachene coina. Niritiin jauriaanejeein aitiin cacha coaunaane jaunte, Jesocurisito cacha nichaachene coreniha cana belaaain cana rae Cana Coaunera. <sup>10</sup>Nitohanihana jaunte jianacoon cana teranu que Jesocurisito letoae Cana Coaunera, coaraain coitucuhacachene coina. Cana coreniha ohin ichanaa Jesocurisitona jaunte, ohacachene necairichanaa coaraelanaala, neculucohin onaachara-nejeein nerichaachein coaiten turuha Jesocurisitone.

<sup>11</sup>Nii jaunte canu cocoinaain caenoaain caletoe Cana Coaunera, rai nere beebejein Jorioniheichuru relaanue coina. <sup>12</sup>Nii jaunna chaque casilanaala nere beebejein cachaauru relaanune coreniha, caa catohaneein caseteco neein neeun niqiu, nena coejelanaala caa neeun, cana coroatajana coitucuhanune jaun. Acate laen naine cacorataanein cacoeraiha ne, coaiten enacoauneein turuhane reentiaain.

<sup>13</sup>Nii jauriaa ichelaanulune rijijieein ichaechajeein neeu. Jesocurisito cacha nichaachene jaun, coanete Jesoso esenetaain, Cana Coaunera, leeochoaauru, naonjoain belaaain nihacache. <sup>14</sup>Cana suujua cuhane ichaoha Cana Coaunera Suujuena jaun uhaain, atiin que neeunaain nii ichei Cana Coauneraacha tenojoin erenaa rauhi tonoraain ichaau.

#### **Cacoelaain cacorataaniha Onesiforo ne**

<sup>15</sup>Nii coitucuhine tocohaneente caque jaolecoore saain Asia cocoaichacuru.

Fijelo, Eremojene, naonjoaihunri nihanatiinte saain caque jaolecoore.

<sup>16</sup>Onesiforo sinijiera, bereecuru, naonjoain belaaain coroatajaneine Cana Coaunera atiin carai, araai saain cacoelaain cacorataanihane coreniha. Acate caseteco neein nihanu natiin, cacoreniha necoejelanaala cacorataane. <sup>17</sup>Cau Romau turuhinte, mainajejin amuhemujeein caariin, tabiicha cauruhin atiin cacorataane. <sup>18</sup>Nii choae tacaain techu, nii Efesoo nihaca jiniiquiine bana, jataain cana coroatajanelu nii Onesiforo. Nii coreniha atiin belaaine Cana Curuaanaa Jesocurisito, inae coaiten cau chauratane que turuhane bana.

#### **Coujuriu Jesocurisito ere tonoraera neein nena tocohaneei necairichanaa abaantaain neeu**

**2** <sup>1</sup>Laraajiin atiin neeunaau, ichorataaniha Jesocurisitona jaunna cacalabi.

<sup>2</sup>Cha teinti letoaera nihane erenaa tonorain ichae, nii coaraain relaaute leeochoaauru relaera neein neeine. Inae araai saain cachaauru relaanune jana, aonajerejetohilune jaun, nii rijijieein acaauru relaau.

<sup>3</sup>Charijiein teeinti letoaa acaauru curuaanaane, atiin necairichanaa abaantain ichacure caohati soondarooru laraajiruhane. Nii rijijieein coujurihu Jesocurisito ere tonoraera neein nena tocohanein necairichanaa abaantaain neeu. <sup>4</sup>Joanreein cacha rijijieein ichaonaa nainihe soondaro. Curuaanaa ere tonoraain nihanete ne. Nii rijijieein chu cana Curuaanaa neein niha Jesocurisitona jaun, abaantaain nere tonoraacachenete ne, rai letono neein nihacachene jaun.

<sup>5</sup>Charijiein teeinti necoatijiacane, cacha amuritonaa nainenihaca necoati-

jianaa beraicha ere tonoraain necoati-  
jiae nihacane. Nii rijijieein techu nii  
Moconajaera amuritonaa nainenihaca  
Cana Coaunera Ere tonoraenihacane.

<sup>6</sup>Charijiein teeinti temule jaacane jana  
inae nihane, tonajelanaala caje raain  
que lenoneein nihacache. Nii rijijieein  
techu Cana Coaunera tenojoin  
amihanenaa ichacaachene, tonajela-  
naala raotojoein nerichaacheein,  
itolere que cana belairichain Cana  
Coaunerana jaun.

<sup>7</sup>Caa caitoonjoan que ishujua  
ereerejeein coaacute, coitucueenein  
ichorataanemiin Cana Coaunera,  
aonain coitucuhine coina.

#### Jesocurisito que coaacu

<sup>8</sup>Cana Curuaanaa inoaainsi Rabiri  
feratenojieein niha Jesocurisitone que  
ishujua ereerejeeu. Acate ohane caje  
ichanae. <sup>9</sup>Nii beebejein relanajaanune  
corenihate, leeocho ataebinae chara  
tocohanein *cadena* que canu cositeein,  
catohanein cacasetacaure niqui, nete  
caa quere cacha relaanune jaan  
cositena naineurene laen.

<sup>10</sup>Nii jaunna itolere necairichanaa  
abaantaain atiin Cana Coaunera  
janiinohinchuru relaun, Jesocurisito  
coreniha jianacoo neein, nitajenaa  
charanejeein neuruha Cana Coaunera  
janiinohinchuru cachaurune coina.

<sup>11</sup>Esinaena rauhijiriin aitoreeunni.  
Cana Coaunera esenetaain  
ohacachenete aina ichaorichaa-  
chein.

<sup>12</sup>Necairichanaa abaantaacachenete,  
aina rai Cojoanonaa que  
nerichaachein.

Que jaolecohacachenete, acaetonai  
cana que jaolecoreein.

<sup>13</sup>Cana aitoonjoan ichaenihacache-  
nete, aca laen naitoonjoan ichaa  
cureein.

Nitohaneein laen niha acana jaun.

#### Caohachaaain suujua coaraain niha Timoteeone

<sup>14</sup>Caohachaeniha nitohanaina jaunna  
ichei aitoreeunni, suujuatenajaain  
neeine coina, nabana nitohaneein  
neuruhane coataa. “Coa erenaa  
laojoiiriicha coreniha ita cotaaine  
rijitocoache,” naain Cana Coaunera Ere  
beurera suujuateeu, atiin Cana  
Coaunera notaracae. Nelatihei erenaa  
laojoiiriicha coreniha ita cotaicha  
rijitiin iriha cachane, nabana que  
nererojoecaain neuruha aohanraaurune  
coataa.

<sup>15</sup>Atiin naineeine jaun uhajein Cana  
Coaunera Ere que relanajaan rauhijiriin,  
charijieein teeinti ai leeinjiin cacha,  
laraajiin amihanihane letoera que  
necasaene nii rijijieein Cana Coaunera  
acatiha caohatiin ichei amihanenaa niicha  
tei ichaa. “Caohatoha chamijianeonra,”  
naain ichei iriha Cana Coaunerane coina.  
Jana rauhijiriin relanajaeneinete ii  
necoeje chanureein Cana Coaunera.

<sup>16</sup>Aihana jaun, coa Cana coaunera  
coitucuuruhi rijitiin erenaa baaso que  
irihache, nabana nirijiein cuaajein  
Moconajaeraacha ere tonoraachene  
coataa.

<sup>17</sup>Charijieein teeinti, nijiriha cachane,  
inae suujua lomoha nii cunaine ohe. Nii  
rijijieein techu, nii erenaa baaso que  
ereerejein tonoraachene, inara suujua  
lomoha nii erenaa baasone nitajiha  
curiquicheein. Nii corenihate nitajeure  
Imeneeo, Fileto, naaonjoaaihunri,  
<sup>18</sup>“Chabana oo caje enacoaunein  
nejaberecaain nichaaurain nerinaain  
cacha,” naauruhana jaun. Niritiin  
ereuruhana jaunte, nererojoecaure  
acaauru aohanraauru tabaauru.

<sup>19</sup>Nii jaun, “Cana Coaunerate esinaen  
esenetaeraauru suujua coitucue. ‘Cana

Coanera coitucuera nichaaun, ' naain iriha chunei cachane, baasoneein ichaohane jianemiin, " naa Cana Coanera Erena jaunte, esinaen Cana Coanera cachaneein nihacachene coitucuhacache, inae nii jianein nihacachena jaun.

<sup>20-21</sup>Charijieein teeinti coriquihona loreri asaae ne itolere coata coreti caje ichanohin ojoaichu, baichaje, atane caje ichanohin ojoaichu, baichaje, darohe, enuha caje ichanohin jecoro, coshara, erauru, naonjoain; tabaauru nelateein joanreein lenone curunu que; jana tabaauru nechu jataain joanreein calani joanaana jaannu que nelatei. Nii rijijieein techu, osa jianein Cana Curuaanaa Jesocurisito ere tonoraacachene, nelatiha curichaacheein Jesocurisito cachaneein joanrein amihanenaa caohati ichacaachene.

<sup>22</sup>Aonaau. Enamanaa neeine rai caohacha tocohaneein nenea baaso caje naururuu. Suujua coaraauru cachaauru aina jiniiquiin Cana Curuaanaa bajaabajajeein neeu. Cana Coanera tenojoin ichaonaa rauhi sacuhin, esenetaain Cana Coanera, chamute cacha naonjoain belaa in raotojoein neeu.

<sup>23</sup>Casaje que ita rai ereerecuruha leeochoaurune coa iriha, nabana ita baijiaain ita cotaachene coataa. <sup>24</sup>Nainihe i Cana Curuaanaa Jesocurisito ere que cacha relaeraneein nenea namute cacha aina nejerateein nihane. Itolere cacha aina jerichanejjein ita belaa in nihanete caohachae. Chaen chu raotojoein caohatiin rai suujua coaraain, cotailanaala relaa in <sup>25</sup>raotono que cuain cacha suujuateein nihanete caohachae. Caitono tocohaneein nihanete jerecureniha tabaaurune nihanatiin, acaauru suujuateein acaauru suujua corenaa nainereein Cana Coanera. <sup>26</sup>Inae nitohaneein acaauru

suujua coriha Cana Coaneranete, erenaa rauhi coitucuuruhane caohachanainejjein nichotiha cuurureein Moconajaera caje.

**Naaonjoante curureein cana janonaa satono rai coateen cajija turuhelalajija Jesocurisitone bana.**

**3** <sup>1</sup>Aonaate coitucuhi. Cana janonaa satonohelalaje raite, Cana Coanera coitucuurera cairichaerriin rohecaaa cuurureein Cana Coanera coitucuuruhi. <sup>2</sup>Nitohaneeurite nelaetoha nocoetiin, jataain coriqui mucunaa coacuhin leeochoauru que necohasitaain, ita cotaain, niheichu fojiaraauru ere tonoraelanaala, nechu jataain aansai ataibinaen rijijieein Cana Coanera Ere tonoraelanaala niha cuururein. <sup>3</sup>Chaen-techu necairichanacaauru coroatajanena coacuelanaala, casajenetiin, baaso ichana jerecurehane suujua coaraelanaala ichaain, naonjoaan cuurureein. Chaen techu nechu aansai ataibinaen rijijieein itolere ichaonaa caohacha aina nejerateein, naonjoaan cuurureein. <sup>4</sup>Chaen techu itolere coitucuha nocoetiin niicha jerei ichaain niha cuurureein, Cana Coanera arinaa coacuelanaala. <sup>5</sup>Baaso neein ichaohinte Cana Coanera coitucuha nocoetoha cuurureein.

Coa nitohanai cacha raa. <sup>6</sup>Nabana raachene jana, nechu aaso ene cojoaelorohe coritaain nihane coataa. Nitohaneeurite, suujua coaraelanaala niicha ichana jerei ichaain neeururein. <sup>7</sup>Itolere banate niqui nerelaaururein, nete chabana ichaonaa rauhi coitucuurureen.

<sup>8</sup>Charijieein teeinti Moisesa ere tonoraarene nii coroatajai benanecuru-Janesi, Jambresi, naonjoaanri. Nii rijijieein techu Cana Coanera Ere Rauhi tonoraareneerein nitorijiane i

cachaauru. Naasaheca acauru suujua cuhanena jaunte, Cana Coauneraacha tei ichaonaa rauhi aasaena jerecureein. <sup>9</sup>Jataain chatohanai ichacururiaain, nechú aasoneejoaauruhane coitucuurichaaín saain cachaaaurune jaun. Charijieein teeinti aihure nii Moisesa ere tonoraauruhi. Nii rijijieeinte situha cuurureein nitohaneuri.

**Timoteo suujuatiha  
necairichanaa que Faborone**

<sup>10</sup>Ichelaanune tocohaneente chuhisi caohachaain neei. Chaen techu cachaauru relaanune jaan coitucuhin, quichao coitucuhin, camijianeon coitucuhin, esenetaain quiicha belaa coitucuhi. Chaen techu neunaa casuujuane coitucuhi. <sup>11</sup>Chaen techu caniha nejerateeuruhane jana abaantaa-nune coitucuhi. Antioquiha, Iconia, Listra neein curuajaihuri neseuru nihanune janate, caniha nejerateein carerojoecaauruhane jana, jianacoo camitaa Cana Coaunerane coitucuhi.

<sup>12</sup>Esinae rauhijiriina caa aitoon. Jesocurisito ere tonorana jereraaurute roheca cuurureein niqui, nete <sup>13</sup>raajenihane necairichaa cuurureein nechú aansai casajeuru. Nechú jataain nii rijijieeinte ita coritajeein jeelai amuritoheriin necairichaa cuurureein nechú jataain casajene jaun

<sup>14</sup>Ii laen rauhijiriin nii que nerelaaina jaun iicha esenetai sacuu. Iite nii ichelaera coitucuhi. <sup>15</sup>Canaanai neeine caje coaaneente, Cana Coaunera Quiricha coitucuhi. Nii Cana Coaunera Quiricha que nerelaain esenetaaichene, jianacoo inara tereein Jesocurisito.

<sup>16</sup>Satiinte Cana Coaunera tenojoinnein ne Cana Coaunera Quiricha. Acate cacha relain, cacha suujuatein, cacha suujua raujiain, naonjoainu que nelate,

ichaonaa rauhi coitucuhin caohachaain ichaoha cachane coina. <sup>17</sup>Itolere Cana Coaunera jerenohin amihanenaa ichaain niha Cana Coaunera coitucurerane coina.

**“Atiin aohana jerecureniha cachaaurune  
nihanatiin beeu,” naa Faborone**

**4** <sup>1</sup>Cana Coaunera aina nii turuha uhenenu, nii cau chauratane que nenacauru ichaonacauru, saain onacauru, naonjoaihunri rucucheranu notaracaena caa mijiaainetiin eletoaan Cana Coaunera Ere beebjeeine coina. <sup>2</sup>Atiin aohana jerecureniha cachaaurune nihanatiin rauhijiriin beeute esenetaauruhine. Baaso ichacuruhane raotojoein raujiaain cuaain suujuatenajaun, <sup>3</sup>inae ecu tihane bana erenaa rauhi aohana jerecurenerichaaíne jaun. Nitohaneente, baasoneein coacuhin arajiin acauru relaeranu ariha cuururein, acaauruhacha jerei tocohanein baaso que relanajaeraanu que. <sup>4</sup>Nitohaneente erenaa rauhi aohana jerelanaala que janoriin amuurureein. Amuhin joanreein casajeeicha esenetaain tonoraain raaje necairichaaurureein. <sup>5</sup>Ii laen ishujua coaraain necairichanaa abaantaain Cana Coaunera Ere beebjeeu, jianacoo osa caje mituhin neuruha esenetaaurerane coina. Nitohanein caohatiin chamijianeon ichaa.

**Inae Cana Coaunera tenojoin  
amihanenaa jitaanu**

<sup>6</sup>Inae ichuunejeeonriha ohanune que tihane.

<sup>7</sup>Inae Cana Coaunera tenojoin amihanenaa jitaanu jianelanaala rauhijiriin ichaain. <sup>8</sup>Inae nerichaaín canu amihaneoo core, caque banihaatein Cana Coauneraacha rucujuei,

acaachana inae caa cohajeeun. Inae turuha nii Cana Curuaanaa Joesio, caohacha nejesina ichara neein nenaanete, Aca nii canu amihaneoo coretereein. Coatiha canuhacha rai coreterinaain. Satiin nii turu jereein cohajeraauro rai netonaite coretereein.

#### Saatono

- <sup>9</sup>Cacoharaa uu atiin chajaaajoaain.  
<sup>10</sup>Caquete jaoleque Demasi, caa chauratane que nenacaauru itolere rucuhele cautenu rijihuru jerihana jaun. Nii jaunte naain Tesalonecau cue. Jana Cresentete Galasia bataneu cue. Jana Titote Dalmasia bataneu cue. <sup>11</sup>Acaiha-nejein Locasichate caniha ne cau. Maroco ariin cotijaain ijiniichain uhaau. Acate laen camijianeoo que cacorataanena naine.  
<sup>12</sup>Tiquicono laen letoaaun Efesoo.  
<sup>13</sup>Toroasihu nihanune banana Carpo loreri asaae quela ratirihunlu, uhaau carai uhine. Chaenchu nii canu quirichaauro nii quiicha laenajacoaine maajeein uhau.  
<sup>14</sup>Nii coata que amihanenaa Alejaandorote, jataain baaso neein caete niqi, nete inae cacocaeratereein Cana Curuaanaa. <sup>15</sup>Coaraau. Necoeraain neeu, Cana Coaunera Ere- canaacha beebejei que nejeratihana jaun.  
<sup>16</sup>Camucuhin, cacaje bajaauruha cocoainanacaaihurine janate, cajaohin

caratiriin amuure satiin. Nii coreniha jiaonriha chatohanein tenajaa Cana Coaunerane.

- <sup>17</sup>Nii janate, canu coroatajanein casuuja laraarajie Cana Curuaanaa. Nii jaunna, itolere caa chauratane que nenacaauru Jorio niheichuru rai Cana Coaunera Ere beebejeeun, jianacoo neeuruha esenetaaurerane coina.  
 Nitohaneinte necha aansai atabinaen leeon ujuaae caje jichorocooain jianacoon caete Cana Curuaanaa.  
<sup>18</sup>Itolere baaso cajete canu mitaain canu beraicheein, aina dedeeu nihanune coina. Coanete Cana Curuaanaa corojeein belaihaache inoanlu netiin. Nitohanein neeine.

#### Cana Coaunera esenetaeraauro rai necoiha Faborone

- <sup>19</sup>“Inara coaaujiha jera Faboro” naain beeu, Firisila, Aquila, Onesiforo araaichuru, naaonjoaihunri rai.  
<sup>20</sup>Coriintoote nedae Erasto. Jana Torofimona ratirihun Miletoo, cunaitihana jaun. Naineeine elohena ajiniha uu. <sup>21</sup>Eobolo, Poreente, Lino, Cularia, naaonjoaihunrite ii coaacure. Chaenchu saain cana nejeraauro Cana Coaunera coitucuerate ii coacue.  
<sup>22</sup>Ii aina neeine cana Curuaanaa Jesocurisito. Satiin inara belaa inara coroatajaneine atiin Cana Coaunera. Nitohanein neeine.